

Na osnovu člana 16. stav (4) Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10) Vlada Zeničko-dobojskog kantona, na 90. sjednici održanoj 09.03.2017. godine, d o n o s i

ZAKLJUČAK

I

Utvrđuje se Prijedlog Zakona o dopunama Zakona o javnom redu i miru.

II

Prijedlog Zakona iz tačke I ovog Zaključka se upućuje u dalju skupštinsku proceduru, po skraćenom postupku.

III

Zaključak stupa na snagu danom donošenja.

Broj: 02-_____/17.
Datum, 09.03.2017. godine
Zenica

PREMIJER

Miralem Galijašević

DOSTAVLJENO:

1x Stručna služba Skupštine,
1x Stručna služba Vlade,
1x Ministarstvo unutrašnjih poslova,
1x a/a.

PRIJEDLOG

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na ____ sjednici održanoj dana _____ 2017. godine, donosi

Z A K O N **O DOPUNAMA ZAKONA O JAVNOM REDU I MIRU**

Član 1.

U Zakonu o javnom redu i miru-Prečišćeni tekst ("Službene novine Zeničko-dobojskog kantona", broj: 12/16), u članu 3. iza tačke 26. dodaju se nove tačke 27. i 28. koje glase:

" 27. ko prikuplja dobrovoljne priloge protivno odredbama člana 5a. ovog zakona,
28. ko na javnom mjestu vrši fiziološku potrebu ili izloži intimne dijelove tijela pogledu drugih."

Član 2.

Iza člana 5. dodaje se novi član koji glasi:

"Član 5a.

Dobrovoljni prilozi (u daljem tekstu: prilozi) građana mogu se prikupljati u skladu sa odredbama ovog zakona.

Priloge mogu prikupljati pravna lica, humanitarne ili druge organizacije, kao i građani ako za to imaju odobrenje načelnika općine, odnosno gradonačelnika grada na čijem području se prilozi prikupljaju.

Zahtjev za izdavanje odobrenja za prikupljanje priloga, pored ostalog, mora sadržavati cilj, svrhu i način prikupljanja, podatke o mjerama koje će se preduzeti radi osiguranja od eventualnih zloupotreba u vezi prikupljanja, vrijeme za koje se traži odobrenje i mjesto prikupljanja priloga.

Pravno lice, humanitarna ili druga organizacija i građani kojima je odobreno prikupljanje priloga, dužni su preduzeti mjere koje su naložene odobrenjem za prikupljanje priloga.

Načelnik općine, odnosno Gradonačelnik Grada rješenjem će odbiti zahtjev iz stava 3. ovog člana ukoliko prikupljanje priloga može izazvati uznemirenje građana ili narušiti javni red i mir, ili ako cilj i svrha prikupljanja priloga nije opravdana.

Prikupljanje priloga može se rješenjem zabraniti ukoliko nastupi jedan od uslova utvrđenih u stavu 5. ovog člana, ili ako se utvrdi da se ne sprovode naložene mjere osiguranja ili su u zahtjevu navedeni netačni podaci o cilju ili svrsi prikupljanja.

Protiv rješenja iz stava 5. i 6. ovog člana može se izjaviti žalba u roku od 15 dana nadležnom Općinskom ili Gradskom organu uprave koji je izdao rješenje.

Žalba iz stava 7. ovog člana ne odlaže izvršenje rješenje.
Odobrenje iz stava 2. i 3. ovog člana nije potrebno u slučaju kada:

1. se prilozi prikupljaju u okviru privrednog društva ili drugog pravnog lica za zajedničke potrebe ili potrebe pojedinih zaposlenika tog privrednog društva ili drugog pravnog lica,
2. prikupljanje priloga organizuje mjesna zajednica na svom području ili kućni savjet u zgradi kojom upravlja, radi određenih ciljeva u okviru djelatnosti mjesne zajednice, odnosno kućnog savjeta,
3. se prilozi prikupljaju umjesto ulaznica za priredbe koje organizuju politička udruženja, sindikati, udruženja građana i drugi oblici udruživanja i organizovanja, a u skladu sa programom svojih aktivnosti,
4. se provodi u službenim, poslovnim prostorijama i
5. prikupljaju humanitarne organizacije u okviru svoje registrovane djelatnosti.

Član 3.

U članu 6. u tački 1. iza broja "22." stavlja se zarez i dodaju riječi 27. i 28."

Član 4.

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj:
Datum,
Zenica

PREDSJEDAVAJUĆA SKUPŠTINE

Draženska Subašić

Obrazloženje

I – PRAVNI OSNOV

Predloženi Zakon o dopunama Zakona o javnom redu i miru - Prečišćeni tekst donosi se na osnovu člana 37. stav 1. tačka f) Ustava Zeničko-dobojskog kantona.

II – RAZLOZI ZA DONOŠENJE ZAKONA

Zakon o javnom redu i miru - Prečišćeni tekst objavljen je u „Službenim novinama Zeničko-dobojskog kantona“, broj: 12/16.

Donošenju Zakona o dopunama Zakona o javnom redu i miru - Prečišćeni tekst pristupilo se na inicijativu Grada Zenice koja je Vladi Kantona na mišljenje proslijeđena aktom Skupštine broj: 01-02-7250-1/16 od 21.09.2016.godine, a odnosi se na dopune Zakona o javnom redu i miru Zeničko-dobojskog kantona-Prečišćeni tekst, kao i na inicijativu pomoćnika gradonačelnika Službe za inspekcijske poslove.

Podnesene inicijative podrazumijevaju dopune Zakona o javnom redu i miru u smislu da se u članu 3. predmetnog zakona dodaju nove tačka 26 i 27. a iza člana 5. da se doda novi član 5a.. Navedene dopune se odnose na uređivanje materije oko prikupljanja dobrovoljnih priloga, ko i kada može prikupljati dobrovoljne priloge u humanitarne svrhe kao i kaznene odredbe za lica koja prekrše odredbe koje definišu način prikupljanja dobrovoljnih priloga, kao i da se propiše zabrana vršenja fizioloških potreba ili izlaganja intimnih dijelova tijela pogledu na javnom mjestu i da se za prekršioce istih uvede kaznena odredba. Navedene inicijative se predlaže radi ujednačavanja propisa sa drugim kantonima i preciznijeg definisanja ove oblasti koje su uočene u svim lokalnim zajednicama.

Radi svega navedenog, imajući u vidu činjenicu da se radi o dopunama samo tri člana Zakona koji su bitni i čije dopune će definisati pojave i radnje koje do sada nisu bile definisane u zakonu, a koje će olakšati i rad policijskih službenika u primjeni ovog Zakona, predložemo donošenje Zakona o dopunama Zakona o javnom redu i miru-Prečišćeni tekst u navedenom tekstu i to po skraćenom postupku obzirom da nije u pitanju obiman i složen Zakon.

Napominjemo da dopune predmetnog Zakona nisu pripremljene po Jedinstvenim pravilima za izradu pravnih propisa u Zeničko-dobojskom kantonu iz razloga što je osnovni tekst Zakona o javnom redu i miru sačinjen prije stupanja na snagu pomenutih pravila.

III – PRAVNA RJEŠENJA

- Dopuna člana 3. dodavanjem novih tačaka 27. i 28. izvršena je iz razloga što se radnje opisane u tačkama 27. i 28. sve učestalija pojava na području ovog kantona a iste nisu bile definisane postojećim zakonom kao i radi usaglašavanja navedenih odredbi sa odredbama u drugim kantonima.

- Dodavanjem novog člana 5a. propisana je procedura izdavanja odobrenja za prikupljanje priloga u humanitarne svrhe, sadržaj zahtjeva za izdavanje odobrenja, ko se

može baviti prikupljanjem priloga, kako i gdje se može vršiti prikupljanje priloga i propisani su izuzeci za koje nije potrebno odobrenje.

- U članu 3. propisane su kazne za lica koja ne budu poštovala odredbe iz tačke 27. i 28. i iste su određene u visini od 200-500 konvertibilnih maraka.

- U članu 4. propisano je da ovaj Zakon stupa na snagu osmog dana od dana objavljivanja u Službenim novinama Zeničko-dobojskog kantona.

IV – FINANSIJSKO OBRAZLOŽENJE

Predložene dopune Zakona o javnom redu i miru ne iziskuju dodatna finansijska sredstva u budžetu Kantona.

MINISTARSTVO UNUTRAŠNJIH POSLOVA
ZENIČKO-DOBOJSKOG KANTONA

MINISTAR
Nikola Arsenić